

**PEMBERITAHU PERTANYAAN BUKAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : BUKAN LISAN**

**DARIPADA : DATUK SERI DR. SHAMSUL ANUAR  
BIN HAJI NASARAH [ LENGGONG ]**

**SOALAN**

**DATUK SERI DR. SHAMSUL ANUAR BIN HAJI NASARAH [LENGGONG]** minta **MENTERI PERTANIAN DAN INDUSTRI MAKANAN** menyatakan perancangan pembangunan pelancongan agro makanan dan di manakah kawasan yang telah dikenal pasti mempunyai potensi yang besar untuk dibangunkan.

**JAWAPAN**

**Tuan Yang Di Pertua,**

Untuk makluman Ahli Yang Berhormat, Kementerian Pertanian dan Industri Makanan (MAFI) telah melancarkan Dasar Agromakanan Negara 2.0 (DAN 2.0) yang mana antara lain MAFI akan terus memberi perhatian kepada industri agropelancongan negara. MAFI melalui Jabatan dan Agensi menjadi penggerak utama kepada inisiatif pembangunan industri agropelancongan dari segi meningkatkan kualiti kemudahan, mempelbagaikan produk pelancongan, mempergiatkan promosi dan mempertingkatkan aspek keselamatan di pusat agropelancongan.

MAFI telah menyediakan bantuan kepada pengusaha-pengusaha pusat agropelancongan di seluruh Malaysia seperti berikut:

**i. Geran membina dan menaiktaraf infrastruktur serta kualiti perkhidmatan di pusat agropelancongan.**

Program ini bertujuan untuk memperkasakan aktiviti ekonomi dan keusahawanan masyarakat tani dengan mempelbagaikan sumber pendapatan mereka serta membuka peluang pekerjaan baru kepada penduduk setempat. Sepanjang RMKe-11, Kerajaan menyediakan sebanyak RM20 juta bantuan/geran membina dan menaiktaraf infrastruktur kepada pusat-pusat pelancongan yang diusahakan oleh golongan sasaran bagi meningkatkan jumlah kutipan hasil, pendapatan serta jumlah pengunjung ke pusat berkenaan. Bagi tahun 2020, sejumlah RM3,366,090 geran telah disalurkan kepada 35 pusat agropelancongan manakala pada tahun 2019 sejumlah RM3,396,200 telah disalurkan kepada 56 pusat agropelancongan. Inisiatif ini diteruskan oleh MAFI dalam RMKe-12 juga.

**ii. Khidmat nasihat dan bimbingan jabatan dan agensi, MAFI**

MAFI bersama jabatan dan agensi di bawahnya dari semasa ke semasa turut memberikan khidmat nasihat kepada petani dan penternak yang berminat untuk memajukan kawasan pertanian mereka untuk dikembangkan menjadi pusat agropelancongan. Seiring dengan itu juga, satu garis panduan telah disediakan untuk menjelaskan kaedah dan tatacara pelaksanaan geran membina dan menaiktaraf infrastruktur pusat agropelancongan di bawah MAFI. Garis panduan tersebut boleh dicapai di laman sesawang rasmi MAFI.

**iii. Mempergiat aktiviti promosi**

Salah satu usaha MAFI untuk mempergiatkan promosi pada tahun ini adalah dengan memperkasakan elemen pemasaran produk dan perkhidmatan di pusat agropelancongan secara digital. MAFI melalui Lembaga Kemajuan Pertanian Muda (MADA) sedang menyediakan program perintis pemerksaan industri agropelancongan melalui transformasi digital kepada pengusaha pusat agropelancongan di bawah setiap Jabatan dan Agensi MAFI. Program ini bertujuan memanfaatkan penggunaan platform digital secara kreatif dan meluas melalui media sosial serta memperluaskan kebolehcapaian kepada produk serta perkhidmatan di pusat agropelancongan seterusnya dijangka mampu menjana pendapatan tambahan kepada golongan sasaran.

Setiap negeri di seluruh Malaysia mempunyai potensi tersendiri yang boleh dimajukan sebagai hub agropelancongan. MAFI sedia membantu usahawan-usahawan yang berminat dan mempunyai perancangan hebat dalam membangunkan sesebuah tempat menjadi pusat agropelancongan. MAFI sedia memberi khidmat nasihat serta bimbingan supaya industri agropelancongan di Malaysia lebih maju dan berdaya saing.

Sekian, terima kasih.